

TE HAERENGA TUARUA MAI O TE KARAITI.

(*Na Kenana Aata Wiremu.*)

HE tini nga korero pohehe e panuitia ana i tenei wa mo te hokinga mai ano o to tatou Ariki o Ihu Karaiti. No reira he mea tika rawa kia whakamaharatia tatou ki nga kupu a te Karaiti me era atu kupu o te Karaipiture kei tinihangatia etahi.

He maha āna kupu whakarite, he maha ano āna kupu mārama, mo tōna hokinga mai ki tenei ao; e taea hoki te mohio ki te tikanga o aua kupu ki te whai whakaaro te tangata ki te korero tonu i te Paipera i tenei ra, i tenei ra, me te inoi atu ki te Wairua Tapu hei tohutohu hei whakaako i a ia ki te tikanga.

E tino mārama ana, e kore a Ihu e whanau tuarua mai, e kore e hoki mai me tona tinana Maori: engari ka puta tinana mai. ko tōna tinana ia he mea Wairua, he mea korōria, a e tino kitea ia e o tatou kanohi. Ko etahi kupu e ki ana e haere puku mai ia “ano he tahae i te po.” a he tokomaha e rokohanga e Ia e moe ana—ara e moe ana te ngakau me te wairua ki roto, i nga mahi he a te ao, a te kikokiko ranei, i nga mahi ahua-reka (takaro) noa iho ranei, a e kore ratou e mohio, e kite ranei i ia ia i taua wa. E haere mai ana Ia ki te tino whakaora, ki te tango kia a Ia, i te hunga e whakapono pu ana e tatari ana ki a Ia. Ko tana mahi tuatahi tera.

E kore e mohiotia te haora, te rangi ranei; engari kia kitea nga tohu i homai e Ia e puta ana ki te ao ka mohiotia e ratau *ka Tata Ia*.

Tirohia Ruka 12. 35-40; 1 Teha 4, 14-7 me 5, 1-10; Hip. 9. 28; Whkte. 3, 3.

Ko etahi kupu e ki ana ka kitea ia e nga kanohi katoa e haere mai ana i runga i nga kapua, ak a wehi ka tangi nga iwi katoa e noho ana i te ao a taua wa.

Itemea hoki ka riro atu te hunga e tumanako ana e tatari ana ki a Ia, katahi ka mohio nga tangata e mahue ki te ao nei he tika nga kupu o te Karaipiture mo te Rā nui o te Ariki, ka mahara hoki ratou ki nga tohu i korerotia; a ka oho ake te ngakau i te moe. ka hē te manawa i te wehi ki te Rā whakawa. a ka kitea e te katoa, puta noa i te ao, te Tama a te Atua e haere mai ana (me tona hunga tapu hoki kua riro ra i a Ia) i runga i nga kapua o te rangi me tona kororia nui, ki te whakarite i te whakawa, ki te whakahaere hoki i ona tikanga tapu ki te ao. Tirohia Ma. 24, 30. 31; 2 Teha 1, 7-10; Whkite 1, 7; Mah. 1, 11.

No reira e nga hoa “kia pehea ra he tikanga ma koutou i runga i te whakahaere tapu, i te karakia me te tumanako atu, me te tākare atu ano koutou ki te taenga mai o te ra o te Atua.” (2 Pit. 3, 11, 12).